

Gvaq geij ngoenz, de dungx indot dingj mbouj ndaej, maezngunh lo. Bohmeh de youh soengq de daengz yihyen. Gyoengq doengzhag mbouj nyaenxsim, youq banhcangj daiq-doengh lajde, caezgya vih de gien ngaenz, 49 boux vunz, gungh gien ndaej 3000 lai maenz. Ndaw ban dingzlai vunz dwg daj lajmbanj daeuj, moix ndwen cienzgwn bak lai maenz, mizmbangj doengzhag baengh ngoenz-singhgiz bae dajgoeng canh ndaej ngeih samcib maenz bangbouj cienzgwn. Hoeng youq dangqnaj gunnanz, caezgya cungj yiedsim yienh ok fwngz. Ndaw ban doengzhag moix boux cungj sij vah hohfuk youq gwnz ceij, baeb baenz hagceij soengq hawj Dahfeih.

Gij cienz bohmeah Dahfeih ciq ndaej caeuq ndaw ban gien ngaenz gya hwnjdaej cij miz 9000 maenz, liz cienzsousuz lij ca haujlai. Dou cungj simgip dangqmaz, gig maqmuengh bingh Dahfeih ndaej caeux di yw ndei. Seiz youqgaenj, secangj siengj

Doengzhag Cingzlaeg

同 学 情 深

□ Vangz Gyanghmyauz / 王江苗

ok aen banfap, sij cangyisuh, fat-doengh yozyau hagseng gien ngaenz. Geij dahsau dou moix ngoenz banringz caeuq banringzgvaq cuengqhag couh youq ndaw yozyau bak loh, henz sizdangz, bakdou yozyau daengj giz vunz byaij ceiq lai haenx baij ok cangyisuh caeuq sienggienngaenz. Geij ngoenz seizgan, youq ndaw yozyau couzcomz 20000 lai maenz. Ndaw sienggienngaenz, mboujdan miz ngaenz, lij miz vunzsimndei soengq hawj Dahfeih hohgaj, baihgwnz sij dwk gak cungj vah hohfuk.

Dahfeih youq yihyen yw bingh, vunzcaen de vihliux canh ngaenz hawj de guh soujsuz, daeuj daengz

ndaw singz dajgoeng. Dahnuengx de youq suzse dou youq, moix ngoenz caeuq dou soengq gij gwn bae yihyen hawj de. Baengh vunzlai gien ngaenz, caencik baengzyoux bangcoh, Dahfeih ndaej swnhleih guh soujsuz, soujsuz baenzgoeng lo. Hojsik bingh fatyienh nguh lai, rongzva Dahfeih deng gvej bae lo. Valiuz mbouj geij lai nanz, byoem de loenq caez, vunz hix byomnyieg haujlai. Hoeng moix baez miz vunz daeuj yihyen yawj de, de cungj riunyumnyum. Hoeng mbouj miz vunz seiz, mbouj rox de geijlai siengsim nanzgvaq. Bingh yw ndei le, Dahfeih dingz hwnjhag bi ndeu, youq ranz yietnaiq.

Dou yaek bae sizsiz seiz, Dahfeih dauqma hwnjhag, najriu de hix dauq lo. Dou bizyez seiz, de doiq dou gangj: “Gij saeh sou bangcoh gou, gou cungj rox, ciuhvunz cungj mbouj ndaej lumz.” Dou naeuz: “Dou cij maq-muengh caeuq mwngz youq benq lajmbwn, lij ndaej caez diemheiq hoengheiq doxdoengz, yawj daeng-ngoenz hwnjroengz.”

Dahfeih bizyez seiz gou lij doe yenzgiuswngh. Aeu QQ ganggoj, de lwnh hawj gou de dauq daengz ranzmbanj guh hong lo, gou hoh de fanh saeh swnhleih. Doeklaeng gou bizyez camgya gunghcoz, daihgya cungj nyaengq, lienzhaeh hix cug-ciemh bienq noix lo. Hoeng gou rox, couhsuenq mbouj ciengzseiz lienzhaeh, hoeng cijaeu gou ra de, vangjloz baihhaenx, de baez yawjraen cungj sikhaek hoizfuk siusik hawj gou, gamjcingz dou mbouj rox aenvih seizgan caeuq lizgyae couh bienq fouz.

(sat)

Daxbuz Bae Lienhndang

奶 奶 去 健 身

□ Baob Vwazcingh / 潘文洁

Daxbuz gou gaenq 70 bi lo, de ndangdaej haemq nyieg, bingzseiz mbouj dwg gok neix in couhdwg gok haenx dot, haih ndaej de naengh hix naengh mbouj onj, ninz hix ninz mbouj ndaek. Bohmeh gou ciengzseiz cawx laeujyw hawj de gwn, cawx yw’nyaq hawj de oem, hoeng ngamq ndaej ndei saekseiz.

Bohmeh gou mbouj hawj daxbuz guh hong, hoeng daxbuz naeuz lwgda yawj mbouj ndaej, cungj siengj guh. Baez daengz hong nyaengq seiz, bohmeah bae ndaw reih ndaw naz guh hong, gou caeuq daxbuz youq ranz dak haeux, sou haeux. Yienghneix baenzngoenz roengzdaej, ndokndang daxbuz engq in lo. Gou haemhhaemh cungj bang daxbuz dub hwet, daxmeh bang de nap sa.

Daxmeh gou gyaiez diuqfoux, haemhhaemh cungj daengz giuzcangz gyaiej mbanj bae diuq. De ciengzseiz doiq daxbuz naeuz: “Daxmeh, diuqfoux ndaej lienhndang, ndokndang soeng, ninz hix ndaek lai, mwngz riengz gou bae diuq ba.” Daxbuz dingq le cungj ngauz gyaiej naeuz: “Gou 70 bi lo, diuq maz foux, najmong lai, mbouj bae, mbouj bae.”

Miz haemh ndeu, daxmeh doiq gou naeuz: “Gwn haeuxcaez sat le, gou siengj daiq daxbuz mwngz bae diuqfoux, mwngz bang gou dungyenz de, rox lwi?” Gou bek aek doiq daxmeh naeuz: “Cuengqsim, gou rox lo.”

Vanjdawh sousib ndei le, daxmeh byaij daengz dangqnaj daxbuz naengh roengzdaej, gaem fajfwngz daxbuz, naeuz: “Meh, haemhneix ronghndwen ronghsaksak, gou daiq mwngz bae guhcaemz.” Gou hix sikhaek byaij gvaqbae, song fwngz gaem cik gen daxbuz, doq ngauz doq naeuz: “Daxbuz, daxbuz, vaiq caeuq gou bae guhcaemz.” Daxbuz yawjyawj daxmeh youh yawjyawj gou, riu naeuz: “Ndei, bae couh bae.”

Gou caeuq daxmeh angqvauvau dwk rex daxbuz daeuj daengz giuzcangz gyaiejmbanj. Gizneix gaenq miz haujlai vunz lo, vunzsai naengh youq henz giuzcangz ganggoj; gyoengq vunzbaz, bang haemq oiq haenx diuqfoux, bang geq haenx diuq gensinhcauh. Gyoengq-vunz raen daxbuz gou daeuj, bouxboux cungj dongx diemzsubsub. Bang buzoiq buzgeq geij boux cungj rag daxbuz gou bae diuq gensinhcauh. Daxbuz launyaenq mbouj gamj diuq, hoeng yawjraen gyoengq vunzlaux caeuq swhgeij nienzgeij ca mbouj lai, gyoengqde diuq ndaej baenzneix gyaieu, de youh yawj dwk dawzyinx dangqmaz. Gou doiq daxbuz naeuz: “Daxbuz, gou son mwngz diuq.” Daxbuz ndwn youq baihlaeng gou, gou baez aen dungcoz baez aen dungcoz son de. Daxbuz uk soem, ngamq son geij baez couh rox lo. Couh yienghneix, song boux raeuz caeuq daihgya diuq bae geij aen cungdaez. Daxbuz diuq dwk buh dumz caez, de naeuz: “Va, gou naiq dwk mbouj miz saek di rengz lo.” Gangj sat couh naengh roengzdaej yietnaiq. Daxmeh byaij gvaqdaej, doiq daxbuz naeuz: “Meh, mwngz diuq ndaej caen gyaieu, baezlaeng haemhhaemh cungj daej.” Daxbuz doq riu doq uet hanh naeuz: “Ndei!”

Daj haemhhaenx hwnj, daxbuz haemhhaemh cungj bae caeuq bang vunzmeh diuq gensinhcauh, danghnaeuz noix haemh ndeu mbouj ndaej bae couh ninz mbouj ndaek. Genhciz daengz seizneix gaenq ndaej bi lai lo. Gij in dot daxbuz hix mbouj rox seizlawz siu bae lo. De bungz vunz couh gangj: “Moix ngoenz lienhndang aen cungdaez ndeu, maz yw hix mbouj yungh gwn.”

Seizneix, bouxvunz bae diuq gensinhcauh gaenq fazcanj daengz 20 lai vunz lo, Daxbuz gou dwg cujcangj bw!



Va Byacwx hai ndaej hoenghhdhd.

Dahsau Lengj Ciuq Gingq

美 女 照 镜 子

□ Cinz Yenzginh Vangz Gozgvanh / 陈元君 黄国观

Gaxgonq, youq Bingzgoj Yen Haijcwngz Yangh Nazhaij Cunh miz boux singq Vangz he an lungzdeih, gyoengq beixnuengx caeuq baengzyoux cungj daengz henz, miz bak lai vunz. Dawz mou dawz gaeq daengz henz deih bae gaj, youh ndaej caeq cojcoeng youh ndaej cingj hek.

Banhaemh, an lungzdeih sat lo, gyoengqvunz hix gwn gaeuq lo, couh boux riengz boux daj gwnz bya ma ranz. Yaek dauq daengz ranz seiz, boux cawjranz roxnyinh fag caxbyaek de lumz youq gwnz bya henz deih, de ganjgip buet fan dauqbae aeu. Dauq daengz lajbya gaenq laep lo, hoeng caen geizheih, gizneix ronghsaksak, lumj gyangngoenz nei, doiqnaj de lij miz dahsau lengj ndeu cingq ciuq aen gingq daej cangndang. Yawjraen aen yienhsiengq neix, de hix mbouj miz sim caiq bae ra fag caxbyaek de lo.

De dauq daengz ranz seiz, gyoengq vunzmbanj ninz gvaq lo. De youq gwnz mbonq fan bae foek dauq, baenzlawz hix ninz mbouj ndaek. Haetlaeng, de caeuq gyoengq vunzmbanj gangj gij saeh neix, gyoengqde hix roxnyinh geizheih dahraix, ndigah couh heuh de daiq caezgya bae yawj.

De daiq cibgeij vunz daengz gizde yawj, boux dahsau lengj haenx mbouj raen lo, cij raen lai miz goengq bya gyaundeideu. Doiqnag goengq bya neix, lij miz aen mboq ndeu, aen bak mboq mwnzrad, raemx bingz lumj aen gingq nei. Gyoengqvunz cungj naeuz, boux dahsau lengj haenx bienqbaenz goengq bya gyaundeideu neix, aen gingq de ciuq bienqbaenz aen mboqraemx lo.